

## M238: Die Wahrheit

0,1 nû wile ich biten den got .  
0,2 der von den juden wart gemarteret .  
0,3 daz er mir verlihe den sin .  
0,4 daz ich müeze künden .  
0,5 den armen unde den rîchen .  
0,6 di kumft vreisliche .  
0,7 den jungen joch den alten .  
0,8 waz uns ist behalten .  
0,9 wâ wir uns sulen enden .  
0,10 wir sîn in dem ellende .  
0,11 unser heimôte ist uns ungewis .  
0,12 dâr in helfe uns der heilige Krist .  
0,13 daz himelrîche ist unser heimuote .  
0,14 diu helle ist der êwige tôt .  
0,15 diu genâde ist daz paradisus .  
0,16 dâr werdent alle di gewîset .  
0,17 die daz umbe got verdienent .  
0,18 di anderen  
0,19 vile vreisliche kêrent .  
0,20 in daz tiefe hellewîze .  
0,21 dâ sulen si wesen inne .  
0,22 mit vile micheler grimme .  
0,23 beidiu naht unde tac .  
0,24 alsô der tiuvel vile wole geleisten mac .  
0,25 iemer âne ende .  
0,26 daz ist daz ellende .  
0,27 des bewart iuch mîne vile liebe .  
0,28 ich ne wile iu niht liegen .  
0,29 iz gehâte alsô werde .  
0,30 der himel zuo der erde .  
0,31 die gewonnen ensament ein kint .  
0,32 des alliu disiu lant sint .  
0,33 einen vile heiligen sun .  
0,34 der lôste uns von der helle grunde .  
0,35 mit sînen vûnv wunden .  
0,36 vertilget er unser sünde .  
0,37 er gap uns beidiu  
0,38 liebes . unde leides .

0,39 übeles unde guotes .  
0,40 swederes uns wurde ze muote .  
0,41 ouch hât er uns geheizen .  
0,42 daz wile er wâr lâzen .  
0,43 gevalle wir wider an den tôde .  
0,44 er ne werde niemer  
0,45 mêt durch uns gemarteret . nû müget ir wânen daz ich tobe .  
0,46 wande ich iu daz leit lobe .  
0,47 swer sô liep leidet  
0,48 leider ungerne er danne scheidet .  
0,49 alsô mac mir sîn .  
0,50 ich lobe iu unseren trehtîn .  
0,51 unde leide iu den tiuvel .  
0,52 er ist âne zwîvel .  
0,53 ein rehter lügenær  
0,54 lât in iu sîn unmære .  
0,55 ich sage iu daz ze wâre .  
0,56 wolt ir noch zuo ime kêren .  
0,57 unde ervollet ir sînen willen .  
0,58 er vrumet iuch in die helle .  
0,59 des warne ich iuch minniclîche .  
0,60 daz gebiutet mir Krist der rîche .  
0,61 unde ladet iuch wider ze lande .  
0,62 nemet bilede bî dem walde .  
0,63 er ist vile schoene unde vile breit .  
0,64 ir sît iuwers muotes vile gemeit .  
0,65 er ne ist iedoch nie sô lanc noch sô grôz .  
0,66 er müeze ze jungeste sîner tolden werden blôz .  
0,67 er wirdet âne wurzen unde âne saf .  
0,68 des gehüget wole die wîl ir habet iuwer kraft .  
0,69 vart ir ze der helle daz ist mir leit .  
0,70 swer tumben herpfet der verliuset sîn arbeit .  
0,71 swer sô winket dem blinden .  
0,72 der verliuset sîne stunte .  
0,73 behüetet iuch in disen kurzen zîten .  
0,74 ir müget lîhte ze lange bîten .  
0,75 bîtet ir sô lange  
0,76 unze ir mit dem grimmen tôde werdet bevangen .  
0,77 sô ir ez denne vile gerne tætet  
0,78 sô sît ir ze spæte .  
0,79 waz mac ich reden mêre .  
0,80 ne welt ir iuch niht bekêren .  
0,81 sô wirt vile lîhte .  
0,82 daz ir mit al gerihte  
0,83 des grimmen tôdes müezet bekoren .  
0,84 sô sît ir iemer mêre verloren .  
0,85 an der armen sêle .  
0,86 geswîchet ir dem hêrren .

0,87 der iuch mit sînem bluote koufete .  
0,88 unde iu di missetât ab vluote .  
0,89 in dem Jordâne .  
0,90 wurde wir ze wâre .  
0,91 alle vrîje gezalt .  
0,92 er holete uns ûz der helle mit sînem gewalte .  
0,93 daz bedenken wir vile liebe in dem sinne .  
0,94 iz en getet nie dechein kint .  
0,95 durch sînes vaters willen .  
0,96 daz ez sich lieze kolen .  
0,97 noch der vater durch sînen sun .  
0,98 nû lônet im mit triuwen .  
0,99 noch wirt ein tac  
0,100 daz iz uns wole gevrûmen mac .  
0,101 habe wir im iht gedienet .  
0,102 des wirt uns gelônet .  
0,103 wir sîn vreisliche wunt .  
0,104 wir sulen wider sâ zestunt .  
0,105 gâhen vile harte .  
0,106 zuo unserem êwarte .  
0,107 unser sünde sule wir in lâzen sehen .  
0,108 unser grôzer sünde verjehen .  
0,109 er vindet uns die strâlen .  
0,110 dâ wir mit geschozzen wâren .  
0,111 belîbet si dâr inne  
0,112 sô wir die wunden gewinnen .  
0,113 sô ne kan si niemer enhein man .  
0,114 mit sînen sinnen geheilen .  
0,115 sô müeze wir siechen iemer mêre .  
0,116 daz müge wir bewaren allez . êr .  
0,117 von diu bite wir uns an den buochen .  
0,118 die arzât suochen .  
0,119 diu getranc ouch die binden .  
0,120 wie gereit wir got danne vinden .  
0,121 sô heilet er uns mîn vile lieben .  
0,122 sô müge wir den êwigen lîp verdienen .  
0,123 der êwige lîp der ist sô getân .  
0,124 dâ ne mac daz wîp noch den man .  
0,125 gehungeren noch gedürsten .  
0,126 gejâmeren noch gevriesen .  
0,127 vile wole sint si behuotet .  
0,128 vore aller slaht noeten .  
0,129 engelen sînt si anelich .  
0,130 iemer unsüntlich .  
0,131 mit allen genâden sint si behuot .  
0,132 ze himele kêr wir noch unseren muot .  
0,133 nâch unser aller heile .  
0,134 unde erweren uns der helle . vore dem urteile .

0,135 nû vorhte ich eines valles .  
0,136 über uns süntær alle .  
0,137 der schuldige der schamet sich .  
0,138 iedoch  
0,139 sol sich nechein man .  
0,140 ze harte missetroesten .  
0,141 wile er sîn haben rât .  
0,142 er vindet einen arzât .  
0,143 der im heilet sîne wunden .  
0,144 unde in machet wole gesunden .  
0,145 diu buoch sagent uns vüre wâr .  
0,146 daz niemannes sünde sîn sô swære .  
0,147 wile er sich lâzen riuwen .  
0,148 mit innericlichen triuwen .  
0,149 got der ist sô genædic  
0,150 er verlîhet im den êwigen lîp .  
0,151 daz liet heizet diu wârheit .  
0,152 daz ist dem tiuvel sô leit .  
0,153 swâ er daz hoeret singen oder sagen .  
0,154 oder dechein rede vone gote haben .  
0,155 war tuo wir armen unsern sin .  
0,156 jâ geschuof uns mîn trehtîn .  
0,157 wâr denken wir vile lieben .  
0,158 daz er uns alle tage dienet .  
0,159 mit weter joch mit winde .  
0,160 alsô der vater sînem kinde .  
0,161 wolt wir im es getriuwen .  
0,162 er gebuozte uns unser riuwen .  
0,163 unde gæbe uns daz tageliche brôt .  
0,164 unde gebuozte uns alle unser nôt .  
0,165 jâ dienet uns allez daz dâr ist .  
0,166 ligentez unde lebentez .  
0,167 diu mæninne joch der sunne .  
0,168 di liuhten uns mit wûnnen .  
0,169 der tac kumet uns alsô iz got gebôt .  
0,170 sich vröuwet der mensche daz er ist gesunt .  
0,171 ich wæne ez ie wart .  
0,172 sît daz Adâm erstarp .  
0,173 daz alsô manic wîp unde man .  
0,174 wider got haben getân .  
0,175 an ir selbes lîbe .  
0,176 des sulen si di nôt leiden .  
0,177 an ire gewande unde an ire hâre .  
0,178 unde an ire geschuohede ze wære .  
0,179 daz dunket mich übele getân .  
0,180 des râtes wile ich abe gân .  
0,181 vile michel jâmer muoz mich hân .  
0,182 daz alsô maniger muoter barn .

0,183 in die helle sol varn .